

四庫全書

子部

欽定四庫全書

子部
同姓名錄卷九

詳校官中書臣孫球

主事臣祁韻士覆勘

覆校官中書臣汪學金

校對官原任典簿臣郭祚熾

膳錄監生臣金國禮

欽定四庫全書

同姓名錄卷九

明 余寅 撰

郭文二

晉郭文河內人少愛山水尚嘉遯入餘杭山窮谷倚木
於樹苔覆而居嘗有猛虎張口向文文視口中有橫
骨以手探去之虎明旦致一鹿於其室前

後涼呂光太安二年撫軍長史王穆襲據酒泉自稱涼
州牧光率步騎攻克之穆單騎奔驛馬驛馬令郭文

斬其首來獻見後涼錄

周密二

晉周密鎮東將軍周馥之子位尚書郎性虛簡時人稱
為清士

周周密宋屯衛大將軍周廣之父歷鄜延晉三鎮節度
使廣德初至太子太師

李弇二

晉李弇李玄盛之祖仕張軌為武衛將軍安世亭侯

宋李弇崇安人紹興進士宰汀之連城政務寬平人不忍欺時為之謠曰訟者息爭居者安仁李公為政百里如春

趙俊三

晉惠帝即位以太尉楊駿為太傅遣長水校尉趙俊等將屯兵四出

宋兩趙俊 一神宗第三子唐哀獻王見世系表

一紹聖進士官朝奉郎隱居杜門建炎末士大夫皆

避地俊獨固守偽齊劉豫以俊為虞部郎辭疾不受以告畀其家卒卻之豫亦不復彊

陳敏三

晉陳敏廬江人為廣陵度支以討封雲功超授右將軍前鋒都督遂據厯陽反為義兵所斬

宋兩陳敏 一無錫人舉進士知台州朝命立元祐黨籍碑敏不肯立監司促之急敏曰誣司馬公為姦臣是誣天也倅立之敏碎其石遂掛冠去

一石城人精騎射累立戰功封武功縣男授武鋒軍都統制終於光州觀察使

薛超二

夏薛超仕赫連昌為尚書魏世祖拔統萬城擒之見夏錄

宋薛超太平興國初為天武指揮使契丹入寇超從大將劉廷翰率兵至徐河賊將領騎出挑戰超躍馬直前連射斃數人敵勢遂卻大軍因奮擊斬首萬餘級

張融二

南涼散騎常侍張融言焦朗兄弟叛據魏興後必為朝廷憂禿髮利鹿孤遣倭檀討之朗面縛出降

南齊司徒左長史張融儀度詭越論辯風起高帝素愛之常笑曰此人不可無一不可有二

王遐三王遇二

晉兩王遐 一簡順皇后之父以華族仕至光祿勳一王祥曾孫鬱林太守

北魏王遇素工巧坐事腐刑得進幸官至吏部尚書爵
宕昌公見佞倖傳

唐至德間常州人王遇弟遐俱為賊執將釋一人兄弟
爭死賊感其義盡縱之

袁甫二

晉袁甫淮南人好學有詞辯詣中領軍何勗自言能為
劇縣勗曰唯欲宰縣不為臺閣職何也甫曰人各有
能有不能勗善之除松滋令

宋袁甫嘉定進士知建寧府遷祕書少監帝曰卿久勞於外篤意愛民每覽所陳備見懇惻甫奏乞力守更化以來求賢如不及之初意

陳卓三

晉元帝將登祚命擇日太史令陳卓奏用三月二十二日丞相令史戴洋謂宜用二十四日帝從洋所請

宋兩陳卓 一咸寧人有田五十頃其兄田止十頃卓願合戶而同之且曰人生飽煖之外骨肉交歡而已

其後兄子康民登皇祐進士官太中大夫

一陳居仁之子紹熙進士官至簽書樞密院事平生
不營產業及卒不能備塋具丞相吳潛移書制置使
以助之賜諡清敏

李讓二

晉李讓李玄盛次子玄盛既領秦涼二州牧以敦煌郡
大衆殷為軍國之本乃以讓為寧朔將軍敦煌太守
統攝崑裔輯寧殊方

後梁李讓汴州富人太祖鎮宣武讓以入貲得幸遂養
為子易其姓名曰朱友讓

張存二

前涼張存敦煌人善用針有奴好逃亡存宿行針縮奴
脚不得動欲別使更以針解之

宋張存冀州人舉進士仁宗時以龍圖閣直學士知成
德軍契丹與元昊結昏謀相首尾聚兵塞上存言河
北諸城宜留意乃以為都運使盡城諸州

周澹二

晉周澹會稽內史周札長子太宰府掾

後魏周澹鄆人多方術尤善醫藥為太史令明元嘗苦
風頭眩澹療得愈由此位特進賜爵成德侯

梁肅三

晉梁肅懷帝時為潁陽令及劉曜陷長安肅自京兆奔
安定推太守賈疋為平西將軍率衆五萬攻曜於長
安見劉聰傳

唐梁肅世居陸渾建中初登文詞清麗科歷右拾遺翰林學士

金梁肅奉聖州人天眷進士官至參知政事世宗謂侍臣曰梁肅以治入異等遂至大任廉吏亦可自勸

李修二

晉李修司徒李膺之子黃門侍郎太弟中庶子

後魏李修館陶人習醫術為太醫令以功賜爵下蔡子常在禁內針藥多效賞賜累加集諸學士百餘人在

東宮撰藥方百卷行於世

張潛二

晉張潛京兆人為駙馬都尉關內侯表言為諸生時有
山鵲飛翔近地市人擲之化為員石槌破得金印文
曰忠孝侯印表上之藏於官庫見博物志

金張潛武清人幼有志節慕荆軻聶政為人年三十始
折節讀書負薪拾穗行歌自得不知其貧也天興間
避兵少室不食七日死

王恭二

晉王恭定皇后之兄孝武擢時望以為藩屏乃以恭為都督八州諸軍事平北將軍兗青二州刺史假節鎮京口既除王國寶復欲除譙王尚之反為所害

唐王恭白馬人少篤學博涉六經每於鄉閭教授弟子自遠方至數百人貞觀初徵拜太學博士其所講三禮皆別立義證甚為精博

崔遊二

晉崔遊上黨人究心儒學自少及長口未嘗語及財利
察孝廉除相府舍人泰始初錄叙文帝故府僚屬就
家拜郎中年七十餘猶敦學不倦

魏崔遊崔挺族孫熙平中征虜將軍趙郡河東太守竝
有政績移置太學於城南閑敞處親自說經當時學
者莫不勸慕號為良守

杜曾二

晉杜曾勇冠三軍為南蠻司馬以反叛臠割

宋杜曾精於律法為濮州小吏嘗奏改科條

晉兩李矩

一平陽人勇毅多權畧志在立功永嘉初為滎陽太守
冠軍將軍擊走石勒屢破劉聰帝嘉其功詔授都督
司州諸軍安西將軍司州刺史封平陽縣侯

一江夏人中書侍郎李充之父官江州刺史見李充
傳

張質二

前涼張質深泉人位金城太守見北史張湛傳

宋張質高唐人右衛大將軍樞密都承旨在樞要五十年精敏端慤未嘗有過

王悅三

晉王悅王導之子弱冠有高名事親色養導甚愛之嘗共奕棋爭道導笑曰相與有瓜葛卿得為爾邪少侍講東宮歷吳王友中書侍郎

北周王悅藍田人以多戰功拜驃騎大將軍開府大都

督進爵河北縣公素儉約不營生業雖出內榮顯家
徒四壁

唐王悅天寶四載為太常博士見裴淮傳

陸曄二

晉陸曄吳人明帝時為領軍將軍以平錢鳳功進爵江
陵伯錄尚書事蘇峻之難曄隨成帝在石頭舉動方
正不以凶威變節

魏陸曄陸侯之後篤志文學位終通直散騎常侍

郭熙二

晉郭熙為新興太守嘗舉劉聰有良將材入為驍騎司馬見前趙劉聰傳

宋郭熙溫人善山水得雲烟出沒峰巒隱顯之態布置筆法獨步一時見畫繼

李式二

晉李式李充從兄以平隱著稱善楷隸中興初仕至侍中

後魏李式李順之子學業知名位西兖州刺史濮陽侯
自以家據權要心慮危禍兄奕有寵於文明太后為
李訢所發併誅

張龜二

晉益州刺史羅尚遣督護張龜助河間王司馬顥討蜀
李特特迎擊龜衆大敗

後燕張願聚衆反屯於祝阿慕容垂遣將慕容德擊之
願子龜恃其驍勇出戰德將王末逆擊斬之

蔡裔二

後趙蔡裔仕石虎為振武將軍見後趙錄

東晉蔡裔事簡文為兗州刺史附殷浩傳

余考二傳其職位固自不同而振武未嘗歸晉兗州未嘗陷趙其非一人可知第傳中皆言有武勇其呼聲皆若雷震皆嘗被盜入室撫牀一呼衆盜齊殞世固有姓名同而事合轍如此者邪亦大奇已

王雅二

晉王雅剗人少知名領太子左衛率孝武深加禮遇雖
在外職多叅大議但不能犯顏廷爭唯唯而已以左
僕射終

北周王雅新罔人有膽勇善騎射沙苑之戰彼軍百萬
此不滿萬人雅擐甲出戰所向披靡周文歎曰王雅
舉身都是膽畧遷車騎大將軍封居庸伯

崔諒二

晉崔諒魏中尉崔琰之孫尚書大鴻臚以簡素稱

宋崔諒滄州人七世同居咸平中詔徵表蠲課調

杜錫二

晉杜錫杜預之子有盛名性亮直以衛將軍長史出為城陽太守不拜仍遷尚書左丞

宋杜錫杜鎬之後官廸功郎

李志二

晉李志司徒李膺之孫襲廣陵侯爵歷散騎侍郎建威

將軍陽平太守

後魏李志字鴻道御史中尉李彪之子年十餘便能屬文彪奇之謂崔鴻曰子宜與鴻道為二鴻於洛陽初授列曹行叅軍擢南荊州刺史所在著績

陸納二

晉陸納陸玩之子清貞絕俗官至尚書令會稽王道子專政委任羣小納望闕而歎曰好家居纖兒欲撞壞之邪朝士咸服其忠亮

梁陸納為湘州刺史王琳長史琳破侯景縱暴建鄴自

疑禍及令納率部曲前赴湘州及琳下吏納等不受
命請復琳本位帝釋琳納等乃降

王蘊二

晉王蘊孝武定皇后之父以吏部郎補吳興太守甚有
德政定后立遷光祿大夫領五兵尚書封建昌縣侯
蘊以恩澤賜爵非三代令典固辭不受

宋王蘊王彧兄子家貧為廣德令明帝即位四方叛逆
以將領自奮及事寧封吉陽縣男歷晉陵義興太守

湘州刺史所在貪縱為世所鄙

樂廣二

晉樂廣涪陽人正始中為尚書令是時王澄胡母輔之等皆任放為達或至裸體廣聞而笑曰名教內自有樂地何必乃爾

北周樂廣安康郡公楊乾運之壻亦以歸附功授安州刺史封安康縣公見乾運傳

劉遵三

晉劉遵并州刺史劉琨之子琨遣遵為質於北魏乞師
擊鐵弗劉虎穆帝命二萬騎助之

南宋劉遵淮南人為臨川王道規諮議參軍從道規破
桓謙斬荀林擊滅徐道覆遷淮南太守封監利縣侯
南齊劉遵彭城人清雅有學行為晉安王記室甚見賓
禮及王立為皇太子仍除中庶子以舊恩偏蒙寵遇
時輩莫及

李鳳五

晉大司馬桓溫率師伐燕慕容暉遣散騎常侍李鳳求
救於秦見苻堅傳

後趙李鳳仕石勒為從事中郎及勒僭號拜尚書共參
軍事

蜀李鳳仕李雄為梁州刺史叛於巴西大將軍李驤討
斬之

北魏李鳳壽春侯李先之孫官中書博士

唐李鳳高祖第十五子封號王厯豫青二州刺史

杜植二

晉杜植杜弼之祖有名蜀土武帝時為符節令

宋杜植杜杞之兄以文雅知名累任監司終於少府監
王儀二

晉王儀王裒之父高亮雅直為文帝司馬東關之役帝
問於衆曰近日之事誰任其咎儀曰責在元帥帝曰
司馬欲委罪於孤邪遂斬之

元王儀鄧州人天資明敏力學不倦官西臺御史中丞

所著有文集

徐儉二

晉惠帝詔拜羅尚為益州刺史督蜀郡太守徐儉等率
七千餘人入蜀討李特見蜀錄李特傳

陳徐儉徐陵長子勤學有志操襲封建昌侯為御史中
丞嘗侍宴賦詩帝賞歎之曰徐氏之子復有文矣

任播二

晉愍帝蒙塵於平陽黃門侍郎任播等竝為劉曜所害

後趙石勒僭即趙王位署置百官以理曹參軍任播為
史學祭酒

李恒三

晉李恒王敦部將承敦命攻譙王承易雄於春陵見易
雄傳

唐穆宗名恒

元李恒西夏人世祖時累功為益都淄萊萬戶從取宋
襄陽江西及平崖山積官中書左丞後討交趾中毒

矢卒

許遜二

晉許遜南昌人生而穎悟太康初為旌陽令棄官歸遇
謐母傳以道術遂斬蛇誅蛟悉除民害乃歸舊隱精
修至道年一百三十六歲舉家昇天

北齊許遜右僕射許惇之弟有幹局乾明中為平原太
守

王銓二

晉王銓為梁王彤參軍時彤已拜大將軍尚書令嘗大會因指單衣補幘以為清銓曰朝野望公舉薦賢才使不仁者遠而位居公輔以衣補幘以此為清無足稱也彤有慙色

梁王銓王或從孫美風儀善占對尚武帝女永嘉公主拜駙馬都尉雖學業不及弟錫而孝行齊焉時人以為二王可謂玉昆金友

晉兩鄭融

一懷帝永嘉五年邵陵太守鄭融為益州流人汝班所害見本紀

一愍帝建興三年蜀郡太守鄭融為李雄裨將費黑所獲見蜀錄

晉兩李舍

一隴西人有文武才畧惠帝時龍驤將軍轉河南尹為長沙王人所殺

一蜀人初為部曲督及李特據蜀拜西夷校尉

羊祉二

晉羊祉太傅羊祐從兄魏郡太守

後魏羊祉晉太僕卿羊琇六世孫假節征虜將軍秦梁
二州刺史當官不憚強禦朝廷以為剛斷時有檢覆
頗為深文所經之處人號天狗下

讀羊太傅傳祉為從兄琇為從弟而琇之裔孫遽名
祉豈未嘗一觀家傳邪雖非本枝而屬頗尊奈何犯
之且名德之後奚宜有此真吾所未喻者

王恂二

晉王恂文明皇后之弟文義通博在朝忠正官至河南尹建立二學崇明五經

元王恂中山人中統初為國子祭酒以精於算術特授太史令命領改厯事恂與郭守敬等徧考厯書晝夜測驗創立新法極為精密書成名授時厯

晉兩何融

一永和八年濮陽太守戴施得後趙傳國璽使參軍何

融馳致京師見石閔傳

一尚書左僕射何澄次子元熙中為大司農

永和元熙相去八十年定非一人

李桓二

晉康帝遣征西將軍伐蜀破別將李桓於江陽見蜀李
勢傳

元李桓建康人由鄉貢累遷江淞儒學副提舉以文鳴
江東紆餘豐潤學者多傳之

趙模三

晉益州刺史趙廞據成都叛遣兵逆西夷校尉陳總總至南安遇廞軍主簿趙模著總服格戰廞兵殺模見其非是更求總殺之見李特傳

唐太宗得蘭亭真蹟命供奉搨書人趙模等搨數本以賜皇太子諸王近臣見法書要錄

宋趙模徽宗子封祁王授開府儀同武勝興寧軍節度使見宗室世系表

王珣二

晉王珣王導之孫弱冠與謝玄為桓溫掾俱為溫所敬
重嘗曰謝掾季四十必擁旄杖節王掾當作黑頭公
皆未易才也孝武時至尚書左僕射衛將軍

元王珣開義人武勇絕人時豪傑各擁衆據地珣招集
遺民十餘萬迎太師穆呼哩以珣為元帥兼領義川
二州以討平張致功加金紫光祿大夫兵馬都元帥
焦嵩二

晉焦嵩安定人為安定太守率衆守雍州會劉曜入寇
雍州刺史麴允告難於嵩嵩素侮允曰須允困當救
之及京師陷嵩亦為寇所滅

西秦焦嵩仕乞伏熾磐為尚書建弘九年商州刺史姚
濬叛降河西熾磐以嵩代濬帥騎三千討之嵩為吐
谷渾元緒所執見西秦錄

晉兩劉沉

一薊人領雍州刺史張昌作亂詔沉將州兵討之尋詔

合七郡諸軍襲河間王顓於長安戰敗被害

一交州秀才與杜弘共據臨賀謀反陶侃至廣州弘遣使偽降侃知其詐追擊破之執沉於小桂

何點二

蜀何點偽主李雄以儒賢招致幕下命子班師事之及班嗣偽位拜為司徒政事皆委於點見李班傳

梁何點尚書何偃從子性孝友博通羣書齊初徵為中書侍郎太子庶子並不就招攜勝侶清言賦咏優游

自得武帝與點有舊及踐阼召入華林園贈詩酒仍
詔拜侍中點捋帝鬚曰乃欲臣老子辭疾不起

王劭二

晉王劭王導之孫美姿容有風操家人近習未嘗見其
情容歷丹陽尹尚書僕射中領軍

隋王劭王慧龍五世孫沈默好讀書時人稱其博物仕
周中書舍人隋受禪除著作郎祕書少監專典國史
蔡襲二

晉羊祜討吳有功將進爵土乞以賜舅子蔡襲詔封襲
關內侯邑三百戶見羊祜傳

後魏蔡襲圍人名著西州正光中拜齊安郡守孝武西
遷賜爵平舒縣伯除歧雍二州刺史見蔡祜傳

孫輔二

吳孫輔隨孫策襲廬江有功拜平南將軍交州刺史後
權出行東治遣使與曹公相聞事覺權幽殺之

晉趙王倫篡位齊王冏等起兵討倫倫遣中堅孫輔為

上軍將軍率衆出距義師見趙王倫傳

許超二

晉愍懷太子被廢常從督許超傷太子無罪與殿中中郎士猗等謀廢賈后復太子見趙王倫傳

北魏楊元慎善解夢京兆許超夢盜羊入獄問於元慎曰君當得陽城令其後有功封陽城侯元慎解夢義出萬途隨意會情皆有神驗見伽藍記

張瓊二

齊張瓊代人壯健有武畧神武時除滄州刺史驃騎大將軍神武襲剋夏州以瓊為慰勞大使留鎮之為周文帝所害

宋張瓊大名人有勇力善射典禁軍領愛州刺史太祖曰殿前衛士如虎狼者不啻萬人非瓊不能統制即命為都虞候

蕭曄二

齊武陵王蕭曄高帝第五子好詩文射為當時冠絕武

帝即位為中書令祠部尚書輕財重義有古人風

梁上黃侯蕭曄宗室始興王憺之子美才仗氣言多激
揚常乘折角牛穀木履被服必於儒者名盛海內簡
文友愛與新渝建安南浦並預密宴號東宮四友

李超二

晉李超為廣漢太守見蜀錄李特傳

北周李超為應戎二州刺史見李景傳

王覽二

晉王覽王祥之弟孝友恭恪名亞於祥咸寧初為宗正卿封即丘子

唐王覽吳元濟大將驍勇善戰元濟藉以抗王師

許遵二

北齊許遵高陽人明易善筮兼曉天文風角占相逆刺其驗若神齊神武引為館客自言祿命不富貴不橫死是以任性疎誕多所犯忤神武常容借之

宋許遵泗州人第進士知長興縣及宿登二州後判大

理欲立奇以自鬻讞決多戾法律廷論紛然出知壽州

劉蘭三

後魏劉蘭武邑人年三十餘始入小學書急就篇家人覺其聰敏遂令從師家貧無以自資且耕且學三季之後兼通五經為儒者所宗

前秦劉蘭仕苻堅為散騎常侍會幽州蝗廣袤千里堅遣蘭持節為使者發青冀幽并百姓討之

唐劉蘭北海人貞觀初為右領軍將軍攻破梁師都擊走突厥收河南地厯豐州刺史夏州都督封平原郡公以謀反腰斬

北魏兩崔模

一太武時人初仕劉宋為滎陽太守神嘉中平滑臺歸降賜爵武陵男加寧遠將軍

一孝莊時人為西征別將屢有戰功封槐里縣伯後行岐州事擊賊歿於陣

李安人二

南齊李安人蘭陵人仕宋武衛將軍領水軍討晉安王
子勛所向剋捷明帝大會新亭樓勞諸軍主安人五
擲皆盧帝目安人曰卿面方如田封侯相也齊高帝
即位拜中領軍封康樂侯

北魏李安人宣城公李孝伯之子襲父前爵壽光侯司
徒司馬

王協二

晉王協丞相王導之子撫軍參軍襲爵武岡侯

唐王協澤潞節度使劉從諫置為大將轉其子稹主軍
事稹敗伏誅

張沖三

前涼張沖字長思燉煌人家財巨萬悉以散之時人為
之謠曰推財不疑張長思後官金城太守

齊張沖張邵之孫少有至性永明中假節監青冀二州
父卒時遺命祭必土產無用牲物沖在鎮四時還吳

取菓菜每蒸嘗輒流涕薦焉永元初授舒州刺史封
定襄侯

隋張沖吳郡人初仕陳為左中郎將覃思經典撰春秋
義畧及孝經論語前漢音義等書官至漢王侍讀

劉贊三

南宋劉贊明帝第九子封武陵王

唐劉贊散騎常侍劉彙之子宣歙池都團練觀察使祖
父皆名儒惟贊不知書但以強猛立威厚斂殖貨務

貢奉以希恩

後唐劉贊魏州人舉進士致位刑部侍郎律已以法權豪不敢干以私

北魏兩元他

一道武皇帝之臣初帝在獨孤部劉顯謀逆部人穆崇馳告帝乃陰結舊臣元他等幸賀蘭部

一道武皇帝之孫封淮南王持節都督豫洛河南諸軍事鎮南大將軍

李道宗李德林各二

後魏李道宗始豐侯李璩曾孫位直閣將軍道宗弟德林司徒中兵參軍

隋李德林博陵人初為丞相府屬尋加儀同上大將軍爵成安縣子三方構亂指授方畧軍書羽檄日逾百數機速競發口授數人文意百端不加點擲

唐李道宗高祖從子從太宗滅劉武周平竇建德破王世克屢有殊效封任城王貞觀初為大同道行軍總

管召拜禮部尚書改封江夏

北魏兩莫題

一鴈門人關中侯莫舍之孫道武初為大將以功賜爵
東宛侯道武欲廣宮室以題機巧召論興造之制題
久侍頗怠賜死

一代人多智有才用道武時為幢將領禁兵以功封高
邑公窟咄寇南鄙題貳於帝被誅

高叡二

北齊高叡宗室趙郡王瑛之子幼聰慧特為神武所愛
四歲襲父爵讀孝經至資於事父輒流涕獻欵十歲
喪母舉聲殞絕長齋骨立文襄受禪出為定州刺史
六州大都督時年十七稱為良牧

唐高叡趙州刺史封平昌縣子聖厯初突厥來寇叡嬰
城固守城陷被殺

趙霸二

後魏趙霸為華山太守不遵憲度威虐任情大使崔光

奏免其官

唐天復四年遼太祖討黑車子室韋唐盧龍節度使劉仁恭發兵數萬遣養子趙霸來拒太祖伏勁兵桃山下擒霸殲其衆乘勝大破室韋見遼紀

楊椿二

後魏楊椿楊播之弟性寬和善籌策為內給事歷五州刺史進號車騎大將軍兼尚書右僕射節度關西諸將

宋楊椿眉山人累任憲節甚有風績以不附秦檜罷政
家居紹興末兵部尚書叅知政事

李邕三

後魏李邕彭城公李平之子儁爽有逸才與高陽王雍
友凡所交游皆倍季儁秀

唐兩李邕 一宗室號王鳳之孫神龍初為嗣號王邕
妻韋庶人之妹中宗特寵異授祕書監改封汴王月
餘而韋氏敗邕揮刃截妻首以至於朝深為物議所

鄙

一學士李善之子少負美名嘗謁內史李嶠願一觀
祕書嶠假直祕閣未幾辭去嶠驚試問奧篇隱帙了
辯如響因薦拜左拾遺出為北海太守文章翰墨當
世推重有文集七十卷

王震四

北周王震庸國公王雄之子孝閔踐阼以雄有大功別
封震安樂縣伯

晉高祖以兄子重貴為子使博士王震教以禮記久之不能通大義謂震曰此非我家事

宋王震為館閣校勘孔目從輔臣執筆入記上語面授右司員外郎使自書除目舉朝榮之後至吏部尚書龍圖閣直學士

金王震文登人母患風疾刲股肉雜飲食中疾遂愈母沒哀泣過禮目生翳服除目不療而愈皆以為孝感所致特賜同進士出身

元諧二

北魏元諧宗室廣川王畧之子太和四年襲爵

隋元諧洛陽人豪俠有氣調少與文帝同受業甚相友
愛後以軍功進上大將軍封樂安郡公

張讜二

北魏張讜武城人東徐州刺史賜爵平陸侯賦性開通
篤於接恤青齊之士咸相敬重

宋張讜端平間知德興縣縣人頌之曰張侯張侯敷政

優游農樂其業禾麥有秋

劉祥三

南齊劉祥東莞人少好文學性韻剛疎建元中為正員
郎撰宋書譏斥禪代尚書令王儉密以啟聞上敕祥
曰當令卿萬里思愆乃徙廣州

陳劉祥廣陵人幼聰慧十歲能屬文除內史上士封漢
安縣子武帝東征陪侍帷幄平齊露布即其文也累
進車騎大將軍儀同開府

北涼沮渠蒙遜聞劉裕滅姚泓怒甚門下校郎劉祥白
事蒙遜曰汝聞劉裕入關敢研研然何也遂殺之其
峻暴如是

李緯三

北魏李緯平棘人聰慧有才學以中散大夫為聘梁使
前後接對十八人頗為稱職鄴下語曰學則渾繪緯
口則緯繪渾齊文襄攝選不次擢司徒諮議參軍

唐李緯順宗第三子封均王

宋李緯楚丘人嘗知渭州請修籠竿城瓦亭寨後以籠竿為德順軍范仲淹舉緯知軍事及葛懷敏陷歿元昊攻瓦亭籠竿皆不能下

王琛四

晉兩王琛 一武帝踐阼以石苞為大司馬鎮撫淮南時淮北監軍王璞輕苞素微又聞童謠云宮中大馬幾作驢大石壓之不得舒因密表苞與吳人交通帝疑之下詔策免

一宗正卿王覽之子國子祭酒

齊王琛雍州刺史王奩之子永明中為司徒從事中郎
奩敗並誅

隋宗室滕王綸被煬帝猜忌不勝憂懼呼術者王琛問
之答曰王祿相不凡且滕即騰也此字足為善應後
竟廢徙朱崖

後魏兩趙逸

一天水人太武時中書侍郎赤城鎮將性好墳典白首

彌勤年逾七十手不釋卷

一京兆隱士正光初至京師云晉武時人說洛陽厯代興亡事甚悉汝南王聞而異之問何所服餌以致長季逸言不問養生自然長壽郭璞嘗為吾筮云壽五百歲今始餘半耳見洛陽伽藍記

高綽二

後魏高綽高允之孫沈雅有度量博涉經史強直不避豪右厯尚書右丞御史中尉豫并二州刺史

北齊高綽武城長子封南陽王為冀州刺史愛波斯狗
好裸人畫為獸狀縱犬食之後主聞之鎖赴行在問
在州何者最樂對曰多取蠍將蛆混看極樂後主即
索蠍一斗置諸浴斛使人裸卧其中號叫宛轉帝與
綽臨觀喜噓不已謂綽曰如此樂事何不早馳驛奏
聞

宇文貴二

西魏宇文貴昌黎人少從師受學輟書歎曰男兒當提

劒汗馬以取公侯何能為博士業遂棄去為統軍都督屢立戰功進侍中驃騎大將軍封許國公

北周宇文貴宗室齊王憲之子始讀孝經便謂人曰讀此一經足為立身之本封安定郡公出為幽州刺史雖出自深宮而留心庶政過目輒記當時服其明察

徐熙二

劉宋徐熙錢唐人為濮陽太守好黃老隱於秦望山有道士過求飲畱一瓠瓢與之曰君子孫宜以道術救

世當得二千石熙開之乃扁鵲鏡經一卷因精心學之遂名震海內見徐文伯傳

趙宋徐熙金陵人意趣高雅作花木禽魚為古今絕筆論者謂黃筌之畫神而不妙趙昌之畫妙而不神兼是二者其在熙歟見寶鑑

李筠四

隋李筠申國公李穆之孫既襲祖爵忽懷嗇兄子善衡賊殺之文帝求盜不得以筠嘗與從父弟瞿曇有隙

遂殺瞿曇

唐兩李筠 一乾寧初李茂貞犯京師昭宗幸華州獨有都將李筠等兵千餘人為衛華州刺史韓建謀廢立率精兵數千圍行宮請誅筠昭宗大懼遽詔斬之一宗室郇王禕之後山南東道節度掌書記

周李筠太原人為昭義軍節度使宋太祖諭以受禪筠延使者置酒遽索周祖畫像懸壁涕泣不已遂舉兵拒命太祖遣石守信討之拔其城筠赴火死

王穆二

晉王穆丞相王導之孫臨海太守

前涼張天錫為苻堅所滅其世子大豫與長水校尉王穆俱奔河西自號涼州牧改元鳳凰以穆為長史傳檄郡縣後涼呂光遣將擊斬之

劉斌四

南宋劉斌南陽人粗有才用為彭城王義康所寵擢為左長史以傾側用事見文帝疾篤輒就儀曹索晉立

康帝舊事帝疾瘳伏誅

隋劉斌南陽人頗有詞藻從竇建德為中書舍人建德敗復為劉黑闥中書侍郎與黑闥亡歸突厥

宋劉斌定州人幼時父加友為從弟志元所殺及長挾刃伺志元於道刺之不殊詣吏自陳詔志元黥配汝州釋斌之罪

元劉斌歷城人有勇力多智數累立戰功官至濟南新舊軍萬戶

蕭鈞二

齊蕭鈞太祖第十一子封衡陽王

唐蕭鈞蕭瑀從子博學有才望為房玄齡魏徵所重官
太子率更令崇賢館學士所撰韻旨二十卷文集三十
卷

張昇三

北魏張昇滎陽人喪父飲水絕鹽哀毀過度形悴骨立
髮落殆盡朝廷標其門閭

宋張昇仁宗時知開封府內侍楊懷敏夜直禁中而衛士為變皆極論之昇性質樸不能擇言至斥張貴妃為婦人謂懷敏得志將不減劉季述帝不懌

元張昇順昌人四歲即以穎悟聞年十二除正字累官奉議大夫江西儒學提舉陳友諒陷豫章昇不屈死

李瞻二

梁李瞻東陽人起兵誅侯景為賊所執送詣建鄴景出之市中斷其手足刻析心腹瞻正色整容言笑自若

見其膽者乃如升焉見侯景傳

金李瞻玉田人天會四季為德州防禦使行政寬平民懷其惠及改忠順軍節度相率詣京師請留者數千人

鄧琬二

宋鄧琬為晉安王子勛鎮軍長史以文帝孝武並次居第三以登寶位而子勛亦第三乃勸子勛舉兵即偽位於尋陽兵敗為張悅所斬

唐鄧琬貞元二十季為內鄉縣倉督主管河南運米支
餘六千九百餘石爛成灰塵琬被禁二十八季宣撫
使唐扶疏請獲宥見唐扶傳

王雲二

北魏王雲王猛曾孫頗有風尚位南兗州刺史

宋王雲靖康初拜刑部尚書使金許以三鎮賦入雲言
康王將命和好必成帝從之王行次磁州百姓厲聲
指雲為姦賊噪而殺之王乃南還議者以是驗天命

云

劉懷珍二

南宋劉懷珍宗室義宗之子襲封新渝縣侯

南齊劉懷珍平原人仕宋豫州刺史以軍功封中宿縣侯齊建元元年左衛將軍加給事中改封霄城侯

趙隱二

元魏趙隱宛人聰敏善書記為丞相參軍專掌機密齊神武稱其小心恭慎禮遇獨隆以功累遷尚書左僕

射封宜陽王

唐趙隱奉天人咸通末同平章事禮部尚書封天水伯少孤貧力耕以奉親既居宰輔不以權位自高退朝易衣侍母左右歲時伏臘公卿盈門大臣及母之榮無如其比

張亮二

北齊張亮隰城人天平中為行臺郎中典七兵事至尚書右僕射封安定縣男

唐張亮滎陽人房玄齡薦之太宗引為秦府車騎將軍
委以心膺後為相州大都督府長史封鄖國公以謀
反誅

後魏兩李熙

一狄道人為金門鎮將領豪傑鎮武川即唐神堯皇帝
曾祖儀鳳中追尊宣皇帝

一鴈門人神麤四季與盧玄等俱被徵位至太平太守
爵原平子見高允徵士頌

王懿二

劉宋王懿字仲德避晉帝諱以字行以破盧循功封新淦縣侯累遷徐州刺史元嘉中到彥之北侵司兗三州平定三軍咸喜仲德獨有憂色果為魏所乘遂失河南

趙宋王懿王祐長子舉進士知袁州有政績

劉璉二

南宋廢帝時建平王景素被誅景素故秀才劉璉上書

述其德美陳冤不省

南齊劉璡相人方軌正直一日與友人孔暹同舟入東
遇一女子暹目送之曰美而豔璡曰斯豈君子所宜
言乎非吾友也解裳自隔不復同坐其立操如此

趙昶二

周趙昶南安人大統間武州刺史加驃騎大將軍氏羌
屢叛屢討平之明帝錄前後功進爵長道郡公

唐趙昶陳州刺史趙纂之弟陳州被巢寇昶兄弟力拒

卒不能下後巢敗死昭宗即以陳州為忠武軍拜肇
節度使時肇已病乃以位與昶

張瓌二

齊張瓌張永之子仕宋為驍騎將軍昇明初劉遐為吳
郡有異圖齊高帝密令取遐瓌領兵十八人入郡斬
之即授吳郡太守封義城縣侯

宋張瓌張洎之孫同知太常禮院諡錢惟演曰文墨其
子過登聞鼓上訴仁宗使問狀瓌條奏甚切朝廷不

能奪乃賜諡曰思

李茂四

北魏李茂李寶之子襲爵為西兗州刺史入為光祿大夫茂性謙慎以弟冲寵盛懼於盈滿遂託疾遜位

唐李茂宗室徐王元禮之子咸亨初襲父爵險薄無行配流振州

南唐李茂元宗第二子封安樂公拜侍衛諸軍都虞候元李茂大名父卒事母以孝聞母目失明茂禱於泰

安山三季復明母歿居喪哀慟隣家再火延燒千餘家及茂廬皆返風而滅事聞旌之

王晏二

南齊王晏衛尉王鎮之之子性甚便辟為高帝所親待後預明帝廢立謀轉尚書令封曲江縣侯

宋王晏滕人晉開運末為小校入漢授絳州防禦使仕周武寧軍節度迨宋改安遠軍封韓國公

劉準二

劉宋順帝名準初封安成王及廢帝殞大將軍蕭道成奉太后令迎即位三年禪於齊

趙宋劉準鄞人當宋末知國事日非絕意仕進隱居教授卜築青山之原日以教子讀書為事學者稱為南窗先生

張邵二

劉宋張邵吳人初為揚州主簿劉毅居亞相好士愛才當世輻湊惟邵不往武帝聞而重之及即位以佐命

功封臨沮伯除湘州刺史

趙宋張邵烏江人為衢州司刑假禮部尚書使金人
置酒張樂邵以二帝北遷臣子不忍聽樂請止左監
軍撻攬怒囚邵於祚山砦十三年和議成始得南歸

楊慶三

隋兩楊慶 一河間人頗涉書記察孝廉以侍養不赴
母有疾不解襟帶者七旬及居憂哀毀骨立負土成
墳文帝屢加褒賞擢儀同平陽太守

一宗室河間王楊弘之子傾曲善候時變煬帝猜忌
骨肉滕王倫等皆廢放惟慶獲全李密據洛口慶勒
兵拒守歲餘城中糧盡遂降

宋楊慶鄞人父病貧不能召醫剗股肉啖之良已其後
母病不能食慶取右乳焚之以灰和藥入口遂瘥久
之乳復生宣和末詔表其門曰崇孝

李諤四

隋李諤趙郡人博學善屬文由考功侍郎遷侍御史且

陳時敝糾正風俗上以諤前後所奏頒示天下

唐兩李諤 一德宗第十子順宗即位詔封欽王

一長慶中海鹽令開縣西古涇三百窋長豐閘一節

宣水利民歌其德

宋李諤南康人家貧好讀書舉進士通判吉州倜儻有
才畧所至寇賊屏息

王暉二

後魏王暉王猛曾孫少有美名兼多術藝卒於中書舍

人

宋王暉太原人建隆初右領軍衛上將軍性吝嗇賢甚富而妻子飯疏糲縱部曲誅求民甚苦之

何隨二

晉何隨江陽人舉孝廉不就即家拜本郡太守邦人言議平當者稱何江陽常璩贊曰江陽皎皎命世清淳見華陽國志

宋何隨郿縣人初事蜀為安漢令蜀亡去官送吏取民

芋以自給隨即以綿繫其處償直民視芋見綿相與語曰聞何安漢清廉必此人也見成都府志

張景仁四

後魏張景仁山陰人正光年從蕭寶夤歸化拜羽林監至車騎將軍賜宅歸正里見洛陽伽藍記

梁張景仁廣平人父為同縣韋法所殺景仁時年八歲志在復讎及長手斬其首以祭父墓詣郡就刑時簡文在鎮原其罪蠲一戶租調以旌孝行

北齊張景仁濟北人工草隸侍書東宮後主愛之呼為
博士累進儀同開府總判文林館封建安王自倉頡
以來八體取進一人而已

金張景仁遼西人官翰林學士宋人議和改奉表為國
書稱臣為姪凡七往復然後定其書皆景仁為之世
宗曰張景仁真能文之士

趙柔二

北魏趙柔金城人以德行才學知名歷著作郎河內太

守甚著信惠註解祇洹精舍圖偈六卷為當時俊僧所欽味

有元趙柔涑水人有膽畧善騎射太祖破紫荊關柔以衆歸授涿易二州長史後以功累真定等路都元帥李韶二

北魏李韶李寶之孫由吏部尚書出為冀州刺史政績之美聲冠當時既葬之後有冀州兵千餘人戍荊州還經韶墓相率培冢數日方歸其遺愛如此

宋李韶李彌遜曾孫嘉定進士淳祐間禮部尚書翰林
學士時杜範亦在列二人廉直中外稱為李杜

王冑二

隋王冑臨沂人為著作佐郎以文詞為煬帝所重

宋王冑永春人以春秋擢省試第一為太學博士與諫
官分校禮闈諫官欲私舉所厚冑識其人而言之諫
官色沮乃止

劉韞二

劉宋劉韞宗室長沙景王之孫位雍州刺史侍中領軍將軍及帝廢為蒼梧王韞謂當歸從兄彥節齊高帝惡之被誅

趙宋劉韞劉韜之弟倅三州典二郡皆有政聲及致仕築室縣南有亭臺花木之勝自號秀岑與屏山晦菴諸名賢日夕諷詠其中

張買奴二

北齊張買奴平原人官國子助教經義該博門徒千餘

人諸儒咸推重之

元張買奴燕人官於錢塘病歿葬城西十里外其妻王氏季方十六每旦被髮往奠伏墓大慟久而致疾煢居三十季詔旌其門

楊播二

元魏楊播華陰人為武衛將軍征蠕蠕討崔慧景有功進號平東除太府卿賜爵華陰伯

唐楊播鳳翔人登第隱居不仕玄宗徵為諫議大夫棄

官就養以孝行禎祥表其門閭肅宗就加散騎常侍
賜號玄靖先生

李曄三

北魏李曄李順之孫正光初為冠軍中散大夫南荊州
刺史桓叔興叛入梁資以兵糧令築谷陂城詔曄兼
尚書左丞督諸軍討叔興大破之乘勝拔谷陂

唐兩李曄一即昭宗一宗室鄭王亮之後刑部侍郎

王顯三

前秦苻堅建元十五季賞堂邑之功以王顯為平吳校尉揚州刺史戍下邳

北齊王顯樂平人以醫術自通營進御藥出入禁內累轉御史中尉多所彈劾百寮肅然以營療功封衛國縣伯

宋王顯開封人官樞密使山南東道節度使嘗大破契丹於威虜軍梟獲名王貴將十五人斬首二萬級

宇文溫二

周宗室杞國公宇文亮之子溫襲伯父爵豳國公

隋安平郡公宇文愷之子溫煬帝時為起部承務郎

張善安二

後周于義為安武太守有郡民張善安爭財相訟議曰
此太守德薄所致非其罪也乃取家財倍與之喻而
遣去善安懷恥移貫他州見于義傳

唐張善安年十七便為劫盜後據豫章歸國授洪州總
管復從輔公柝反誅

高明三

北魏高明太武時散騎侍郎遣齋錦帛出鄯善招撫諸國及東還烏孫破洛那之屬遣使貢獻者十有六國見西域傳

元兩高明 一姚安路總管天厯中四方盜起明招流離撫攜貳闕汚萊豐儲峙父老咸相慶幸

一字則誠瑞安人寓居四明至正進士授處州錄事數忤權貴謝病去除福建行省都事道梗不赴所著

柔克齋集及琵琶記行於世

元善二

隋元善洛陽人學通五經文帝即極拜國子祭酒帝視學命講孝經敷陳義理兼以諷諫帝大悅賚錫甚厚元元善大名人父有五兄弟因貧皆客死江淮善往尋骸骨并迎弟姪等一十五喪而歸改葬祖父母以諸喪序列祔於塋次州縣以聞旌其家

李端五

後周李端大將軍李賢之子襲爵西河郡公位開府儀
同從平齊戰歿

唐李端趙州人大歷進士從郭曖遊曖嘗進官太集賢
客賦詩端最工曖賜帛百疋官至杭州司馬

晉李端為南平王高從誨裨將襄州安從進反晉師致
討從誨遣端以舟師為應見南平世家

金世宗之孫和尚封應國公其家奴妄言和尚有異徵
召日者李端卜之端云當為天子事露伏誅

元李端李元禮之子禮部尚書

王瞻二


齊王瞻王玄謨之子負氣傲世好貶裁人物建元初為永嘉太守詣闕跪拜不如儀武帝召付廷尉殺之

梁王瞻王弘從孫為侍中吏部尚書性率亮居選所舉其意多行頗嗜酒每飲或彌日而精神朗瞻居官潔已妻子不免饑寒

劉濬二

南宋劉濬文帝次子元嘉中封始興王出鎮京口帝以
上流之重宜有至親乃以濬為衛將軍荊州刺史後
預元凶逆謀為孝武所誅

元劉濬河南人為連江縣巡檢至正中賊帥王善寇閩
濬將兵拒賊三戰三捷復與賊鏖戰衆潰被執大罵
而死



同姓名錄卷九

欽定四庫全書

子部
同姓名錄卷十

詳校官中書_臣孫球

主事_臣祁韻士覆勘

覆校官中書_臣汪學金

校對官原任典簿_臣郭祚熾

膳錄監生_臣金國禮

欽定四庫全書

同姓名錄卷十

明 余寅 撰

楊纂二

北周楊纂廣寧人勇力絕人從齊神武起兵為武州刺史每歎曰大丈夫富貴何必故鄉若以妻子經懷豈不沮人雄志乃間行入關周文嘉其忠義即授征南將軍大都督封永興縣侯

唐楊纂華陰人貞觀中尚書左丞前後典選十餘載銓

叙人倫稱為允當然抑文雅進酷吏觀時任數頗為
時論所譏

胡穎二

陳胡穎東遷人領馬軍從高祖襲王僧辯又隨周文育
討杜龕授輕車將軍南豫州刺史

宋胡穎紹定進士歷浙西提刑湖南提舉常平性不喜
邪佞尤惡言神異毀淫祠數千區以正風俗

李寬五

隋李寬李密之父驍勇善戰幹畧過人自周及隋數為將領至柱國蒲山郡公號為名將

唐三李寬 一太宗第二子封楚王

一衡陽人元和中始於尋真觀剏石鼓書院以為讀書之所刺史呂溫有詩

一江陽人初名珎以犯新節度諱改名寬有胎息術年百餘歲卒三日聞棺裂聲視之衣帶不解如蟬蛻遂仙去

宋李寬李虛舟之子尚書金部郎中

王藻二

宋王藻光祿大夫王偃長子位東陽太守尚文帝女臨川長公主主性妬而藻別愛左右主讒之於廢帝下獄死明帝疾之使虞通之撰妬婦記

後蜀王藻為孟昶翰林使時安思謙為將多殺士卒以威衆昶與藻謀殺之適邊吏有急奏藻不以時聞昶怒因併斬藻

劉誕二

北魏劉誕廢帝時相州刺史齊神武攻鄴誕嬰城固守
神武起土山為地道徃建大柱一時焚之城陷入地
南宋劉誕文帝第六子封廣陵王孝武立為侍中驃騎
大將軍上頗疑憚被誅

元稹二

後魏元稹官尚書右僕射居洛陽準財里聞里內頗有
怪異遂改為齊諧里見洛陽伽藍記

唐元稹河南人長慶初翰林學士詩名與白居易相埒
天下傳諷號元和體往往播樂府穆宗在東宮妃嬪
近習皆誦之宮中呼元才子

蕭銳二

齊蕭銳太祖第十五子封南平王鬱林即位見害

唐蕭銳蕭瑀之子尚太宗女襄城公主厯太常卿汾州

刺史

李詵二

後魏李詵平棘人位中書侍郎京兆太守初與族兄靈族弟熙等俱被徵事在高允徵士頌

唐李詵宗室魯王靈夔之子清河郡王

周迪二

梁周迪南城人有驚力能挽强弩侯景之亂郡中豪傑推迪為主每戰勇冠諸軍元帝授迪高州刺史封臨汝縣侯

唐周迪洪州商人唐末楊行密圍揚州食盡軍士殺人

而賣其肉廸妻曰勢感如此義不兩全君有老母不可不歸妾請鬻以備行資遂詣屠肆得白金一錠使廸歸

劉子羽二

劉宋劉子羽孝武帝第十四子齊敬王

趙宋劉子羽劉韜長子建炎五年為利州路經略使金人攻蜀張浚之師雖衄而卒全蜀地者子羽之功

楊俊二

隋楊俊元德太子昭之子性好讀書尤重儒素煬帝於諸孫中特加鍾愛化及弑逆之際俊覺變欲入奏至玄武門為司宮者所遏俄而難作遇害

宋楊俊楊存中之子以功臣後仕至簽書樞密院事昭慶軍節度使

後魏兩趙默

一溫人選部尚書侍中賜爵河內公孝文立進爵為王
一趙柔之子武威太守

李渾二

北齊李渾李靈曾孫以父死王事除給事中累轉太子少保以叅禪代儀注賜爵涇陽縣男嘗謂魏收曰彫蟲小技我不如卿國典朝章卿不如我

隋李渾李賢末子以功授上儀同封武安郡公開皇中兄子筠死詔渾襲申國公以奉穆嗣不以奉物分字文述述構以反誅

王錫二

宋王錫太保王弘之子位太子左衛率江夏內史太尉
江夏王義恭當朝錫箕踞大坐殆無推敬

梁王錫左僕射王彧從孫幼而警悟力學不倦致損右
目舉清茂再遷太子洗馬時昭明太子尚幼武帝勅
使入宮不限日數與太子游狎情兼師友

蕭恭二

梁蕭恭宗室南平王次子封衡山縣侯歷衡湘雍三州
刺史善解吏事所在見稱百姓立碑頌德

金蕭恭以材勇稱代父領五州兵擊敗宋師及渡淮襲
康王有功歷兵部尚書侍衛親軍馬步軍都指揮使

薛溫二

北周薛溫薛道衡之兄沉敏有器局博覽墳典尤善隸
書為上黃燕郡二太守以簡惠稱宣政初賜爵齊安
子

後漢薛溫錢塘人乾祐中吳越王俶遷廢主侖於衣錦
私第遣溫將兵衛之胡進思屢請殺侖溫屢行保護

侖以獲安官至鎮國都指揮使睦州刺史

許懋二

梁許懋新城人篤志好學尤明故事天監初除征西諮議叅軍兼著作郎待詔文德省僕射江祐甚推重之號為經史笥

宋許懋仙游人慶厯進士為兩浙轉運副史衢民坐私釀久繫不決懋至明其冤悉出之民感其恩競詣佛寺飯僧祝壽時甘露降於州咸謂德政所感

李賢二

周李賢成紀人保定初授瓜州刺史武帝在襁褓不利居宮中文帝令於賢家處之六載乃還及帝踐阼思賢舊恩徵拜大將軍

唐章懷太子李賢高宗第六子年數歲讀論語至賢賢易色再三覆誦帝問之乃云性愛此言又招集學者注後漢書表上之則天以其狀類太宗疑之逼令自殺

劉藻二

後魏劉藻易陽人涉獵羣籍飲酒至一石不亂太和中授征虜將軍督四軍南伐藻曰臣雖才非古人庶亦不留賊虜陛下當醺曲阿之酒以待百官帝大笑曰今未至曲阿且以河東數石賜卿

唐劉藻大厯中為渭南令秋霖害稼藻飾言所部無損代宗覽奏命御史朱敖再檢渭南損田二千餘頃貶藻南浦員外尉見韓滉傳

杜杲二

隋杜杲杜陵人儀同大將軍行臺兵部尚書賜爵義興縣公有詞辯開於占對前後將命陳人不能屈

宋杜杲邵武人歷任州縣與元兵戰有功進敷文閣學士兼吏部尚書淹貫能文晚歲專意理學嘗言吾在兵間無悖謀左畫得於四書

郭遵二

齊郭遵鉅鹿人為黃門侍郎出自賤微語言輕率嘗於

宮門牽韓長鸞曰王在得言主上縱放如此曾不規諫何名大臣長鸞嫌其率爾便掣手而去

宋郭遵開封人乾興中為延州西路都巡檢使元昊寇延州遵以裨將馳入陣殺數十人敵出驍將當遵遵揮鐵杵破其腦兩軍皆大呼復持鐵槍進所向披靡

柳崇二

齊柳崇解人為河中太守初屈郡郡人失馬疑執十餘人崇不問賊事別借溫顏更問其親老存否農業多

少而微察其詞色即獲真賊二人郡中畏服

宋柳崇河東人以儒學著名終身御布衣稱處士及疾革遺命曰吾讀聖人書朝聞道夕死可矣母得以浮圖法灰吾身

李綜二

元魏李綜海州刺史李渾之祖行河間郡事

唐李綜順宗第七子貞元二十一年封郇王

崔暹二

後魏崔暹武城人官瀛州刺史貪暴安忍人庶患之嘗
出獵遇汲水婦人暹問崔瀛州何如婦人不知是暹
答曰百姓何罪得如此癩兒刺史暹默然而去

齊崔暹崔挺族孫歷太常卿尚書右僕射文宣謂羣臣
曰崔暹清天下無雙

王琚二

北魏王琚高平人泰常中被刑入宮稍遷禮部尚書孝
文以琚歷奉前朝志存公正授散騎常侍冀州刺史

進爵高平王

唐王琚河內人先天初中書侍郎以鐵騎從玄宗誅蕭至忠等拜銀青光祿大夫戶部尚書封趙國公

鄧淵二

元魏鄧淵安定人道武定中原擢尚書吏部郎明解制度多識故事與尚書崔宏叅定朝儀及軍國文記詔策多淵所為賜爵下博子

宋鄧淵湘陰人登崇寧第除國子丞遷虞部員外郎星

變上封事剴切蔡京惡之左遷監酒稅

袁樞二

陳袁樞司空袁昂之孫沉靜好學手不釋卷家本顯貴
貲產充積而樞獨處率素傍無交往非公事未嘗出
游天嘉初為吏部尚書領丹陽尹以葬父拜表自解
宋袁樞建安人詞賦第一除太學錄出為嚴州教授喜
誦資治通鑑苦其浩博乃區別其事而貫通之號通
鑑紀事本末龔茂良奏其書孝宗嘉歎

李湛二

北魏李湛李渾之子涉獵文史有家風兼通直散騎常侍聘陳使副襲爵涇陽男

唐敬宗諱湛

裴寬二

周裴寬聞喜人為征虜將軍與東魏戰於新城因傷被禽至河陰遁還見文王喜其冒死而歸乃手書授持節帥都督封陽夏縣男

唐裴寬裴灌從祖弟開元末為戶部侍郎性友愛弟兄
多宦達子姪亦有名稱立第同居八院相對擊鼓而
食當世榮之

游元二

隋游元任城人大業初尚書度支郎領左驍衛長史督
運黎陽楊玄感作逆元引正義責之被囚不屈見害
宋游元游經曾孫服膺象山之學為文典贍舉進士授
安化簿以理義訓導邑士減泉司鐵課以利民

薛寘二

周薛寘汾陰人驃騎大將軍開府儀同出為浙江刺史
前中書監盧柔學業優深文藻華贍而寘與之方駕
世號盧薛焉

宋薛寘昌國人雅有才學以聖人執權賦領鄉薦調衡
陽簿時史彌堅帥湖南寇起黑風洞檄寘往撫諭將
至有道其姓名者其酋曰即四明作聖人執權賦者
邪遂投戈而退

龔穎二

劉宋龔穎遂寧人少好學益州刺史毛璩辟為勸學從事璩為譙縱所殺故佐吏並逃亡穎號哭奔赴殯送以禮元嘉末刺史陸徽表穎節義不被朝命終於家趙宋龔穎歙州刺史慎儀之姪太祖朝為右贊善大夫慎儀被宣州節度使盧絳所殺穎上言求復季父之讐帝即命斬絳

李繪三

北魏李繪李靈曾孫天保初為司徒右長史其為高陽
內史時河間太守崔謹恃勢乞麋角鵠羽繪答書曰
鵠有六翮飛則冲天麋有四足走便入海下官膚體
疏嬾手足遲鈍不能近追飛走遠事佞人

隋李繪唐宗室淮陽王道玄之祖位夏州總管武德初
追封雍王

唐李繪太原尹李蔚從兄官至刺史見李蔚傳

盧廣二

梁盧廣涿人明經有儒術天監中為國子博士徧講五經言論清雅僕射徐勉深相賞好

唐盧廣戶部尚書盧商之父河南縣尉

楊溫二

隋楊溫高祖母弟之子好學解屬文煬帝即位被誣徙零陵作賦以寄其哀思帝見而惡之轉徙南海

後漢隱帝遇害周太祖遣馮道迎徐州節度使劉贊為漢嗣贊留教練師楊溫等守徐州溫等聞贊不得立

乃閉城拒命太祖命王彥超討之見殺

張文蔚二

梁張文蔚河間人仕唐中書侍郎同平章事太祖始立仍以文蔚為相梁初制度皆其裁定

宋張文蔚張永德之孫咸平初永德請老授太子太師分司西京仍以其孫大理寺丞文蔚釐務洛下以便就養

鄧儼二

北魏鄧儼鄧宗慶之孫安南將軍兼尚書左丞郢州刺史

史

金鄧儼宜民人擢天德第明昌初為戶部尚書

李徹二

北齊李徹平棘人位尚書左丞見李靈傳

隋李徹巖綠人左武衛將軍詔總晉王廣府軍事進爵
齊安郡公時蜀王秀亦鎮益州上謂侍臣曰安得文
同王子相武如李廣達者乎其見重如此

崔彧二

魏崔彧武城人善醫術位至寧遠將軍性仁恕見疾苦輒與治之廣教門生多令救療

元崔彧弘州人剛直敢言世祖器重之刑部尚書參知政事疏言時政多見施行

劉芳二

北魏劉芳彭城人宣武朝尚書令出為青州刺史才思深敏特精經義兼覽蒼雅辨析無疑凡有惑者皆往

詢訪時人號為劉石經

宋劉芳襄州人五世同居詔旌其閭淳化四年入賀壽
寧節賜進士出身

韓武二

梁張彪舉義征侯景景黨趙稜偽就彪計事舉刀刺彪
左右韓武入視遂共誅稜

唐王建為西川招討使欲遂有蜀地因急攻成都且謂
驃將韓武曰城破吾與公遞為節度使武等戰愈力

王德二

北魏王德武川人善騎射常從周文征伐累有戰功大統初加車騎大將軍進爵河間郡公

宋王德熟羊砦人以武勇應募會金人入侵德從十六騎竟入隆德府執偽守姚太師左右驚擾德手殺數十百人衆愕眙莫敢前遂械姚獻於朝欽宗問狀姚曰臣就縛時止見一夜叉耳時遂呼為王夜叉與金人大小百戰雖名王貴酋莫不糜碎

李郁二

後魏李郁李孝伯之後好學沉靖博通經史永熙初左
光祿大夫兼都官尚書於顯陽殿講禮記詔郁執經
羣難鋒起解說不窮孝武及諸王凡預聽者莫不嗟
善

宋李郁光澤人少從楊時學時妻以女紹興初召對便
殿還家築室西山學者號曰西山先生

楊奐二

隋楊暉文帝廢太子勇之子封潁川王

唐楊暉進士及第再遷左拾遺昭宗喜遊宴不恤時事
暉上疏極諫帝面賜緋袍象笏官終諫議大夫

許安仁二

北魏許安仁相州刺史許彥之孫襲爵武昌公

金許安仁交河人大定進士明昌間任汾陽軍節度使
質實無華澹然有古君子之風為時人所稱

趙煦二

北魏趙煦天水人位秦州刺史好音律以善歌聞

宋哲宗諱煦

杜彥二

隋杜彥雲中人開皇初為丹州刺史討平尉遲迥封襄武縣公後拜雲州總管北夷畏憚胡馬不敢至塞

宋高宗建炎元年密州軍校杜彥作亂州守趙野棄城走彥追執之數其逃遁之罪而殺之見趙野傳

李蔚三

後周兩李蔚 一大司農李諧之子博學善文詞位尚書左兵郎中仍聘陳使副江南以其父曾經將命甚重焉卒於祕書丞 一唐宗室襄武王李琛之祖仕周為朔州總管武德初追封蔡王

唐李蔚隴西人乾符初檢校司空東都留守東畿汝都防禦使

崔融二

北魏崔融崔挺族子員外散騎侍郎定州別駕

唐崔融全節人崇文館直學士國子司業為文典麗當時罕比朝廷所頒洛出寶圖頌則天哀冊文及諸大手筆並手勅付融

劉亮二

南宋劉亮彭城人少工刀楯以軍功封順陽侯歷梁益二州刺史忽欲致長生迎武當道士合僊藥服之遂卒及斂屍弱如生

北周劉亮中山人以騎將力戰有功進開府儀同大都

督封長廣公

宋顯二

北魏宋顯廣平太守宋愔長子襲爵列人子

北齊宋顯為西兗州刺史河陰之戰深入沒於陣

王慶三

隋王慶祁人開悟有才畧初仕周從征有功授上大將

軍延州總管開皇初賜爵平昌郡公

北周王慶河間郡公王德之子嗣爵位開府儀同初德

喪父貧無以葬賣慶并一女以營葬事遭亂不復相知及德為平涼郡守始得之

唐大理卿馬曙從人王慶告曙家藏甲兵曙坐貶官而慶無罪中書侍郎魏謩引法律論之乃杖殺慶

李愔三

後魏李愔司徒李喬之後襲爵趙郡公與從兄普濟並應秀才舉時人謂其所居為秀才村

唐兩李愔 一太宗第六子貞觀十年封蜀王

一憲宗第十五子長慶元年封茂王

韓弘二

隋越王侗封竇建德為夏王建德以韓弘為行臺僕射

見建德傳

唐憲宗徵天下兵討吳元濟以韓弘為都統見李光顏傳

裴肅二

隋裴肅河東人開皇初為朔州總管長史見皇太子勇

被廢上書乞封小國使得遷善帝稱其至誠而太子
廣不悅及煬帝嗣位不得調者久之肅亦杜門不出
唐裴肅河內人貞元中自御史中丞兼浙東觀察使時
山賊為亂陷浙東郡縣肅討平之因紀其事號平戎
記上之德宗嘉賞見裴休傳

北魏兩崔鴻

一梁郡太守崔敬友之子正光初為司徒長史加前將
軍著十六國春秋一百卷因其舊記時有增損褒貶

一散騎侍郎崔融之子郡功曹

高乾二

北魏高乾莊帝時為侍中撫軍將軍尒朱氏弑逆乾升壇誓衆詞氣激揚涕泗交流將士莫不感憤遂迎齊神武於滏陽定策立孝武

宋高乾燕人李景據江南潛結契丹乾父霸將契丹命以乾從行使景乾遂挈族歸宋土著亳州

李慎二

北魏李慎司徒李裔之後武定中東平太守

唐李慎太宗第十子封紀王文明元年加太子太師領
貝州刺史少好學長於文史皇族中與越王貞齊名
時人號為紀越

楊坦二

隋楊坦宗室滕穆王瓚之子長沙郡公

宋楊坦太尉廷璋之子屯田員外郎鹽鐵副使

鄭修二

後周鄭脩北海人隱於歧南依巖結宇不交世俗雅好
經史專意玄門前後州將數徵不至刺史魏蘭根頻
遣致命脩不得已暫出一見輒還山舍

宋鄭脩蓬州人年七歲日誦萬言登元祐第知梁州軍
祿有餘悉為小民代輸未及引年翻然而歸所居結
茅扁曰飯牛菴

宋鸞二

元魏宋鸞尚書右丞宋隱族孫東莞太守

宋宋鸞知秦州宋瑤之父監察御史

王凝二

隋王凝隱士王績之兄為著作郎撰隋書未成而死

唐王凝乾符初檢校禮部尚書宣歙觀察使黃巢攻宣
城誓與此城同存亡賊退遇疾有大星墜於正寢卒
時年五十八

李鉉二

北齊李鉉南皮人年十六通六經詣大儒徐遵明受業

稱高弟年二十二便自潛居討論是非撰定孝經論語毛詩三禮義疏及三傳異同周易義例合三十餘卷用心精苦曾三秋冬不畜枕

元李鉉黎陽人守延平擒寧化寨寇解福州圍復進兵擊福安賊戰死贈鎮國上將軍隴西郡公

楊汪二

隋文帝謂諫議大夫王達曰卿為我覓一好左丞達遂私於楊汪曰我當薦君為左丞若事果當以良田相

報汪以達言奏之達獲罪卒拜汪尚書左丞

唐陳纂仁誣雋州都督張審素謀反玄宗詔監察御史楊汪即按當審素實反斬之見張琇傳

韓明二

周韓明少師韓果之子嗣襄中公爵為黎州刺史與尉遲迴謀反被誅

宋韓明為開州守將元兵破開州率所部兵力戰死

劉淵三

前漢劉淵宗室城陽荒王之子初元元年封博石侯

前趙劉淵匈奴冒頓之後姿儀魁偉猿臂善射晉太康末拜建威將軍五部大都督封漢光鄉侯還至左國城上太單于之號尋僭稱帝國號趙

宋寶祐六年元兵至順慶帥守段元鑑城守麾下劉淵殺之以降

石泰二

後趙石勒大興二年署石季龍為單于元輔都督禁衛

諸軍命叅軍石泰撰大單于志

宋石泰常州人遇張紫陽得金丹之法道成作還元篇
行於世壽一百三十七中秋日尸解

李詢三

隋李詢大將軍李賢之子初為元帥長史委以心膂從
韋孝寬擊平尉遲迥進大將軍上柱國封隴西郡公
宋太宗太平興國二年命威勝軍使解暉征并州擒招
討使李詢等六人獻行在見解暉傳

八年西人寇宥州巡檢使李詢擊走之

姚興二

後秦姚興僞主姚萇長子襲位二十二年僞謚文桓皇帝

宋姚興相州人以州校劫殺金人功授武義郎紹興中戰卻金兵於廬州俄鐵騎至興力戰手殺數百人父子俱死詔即其砦立廟旌忠

張進二

後趙張進元城人爲刺奸外部都督給事舉刺不避豪
右軍中憚之號曰張霹靂

宋張進曲阜人拳勇善射太祖奇其才力補控鶴軍歷
事太宗真宗累遷并代副都部署

劉銖二

後趙石鑒僭偽以石閔爲大將軍李農爲大司馬已而
欲誅之命龍驤將軍劉銖結羯士三千進攻不尅反
爲所殺

後漢劉銖陝州人隱帝時知開封府周太祖兵犯京師
銖悉誅太祖家屬太祖入京使人責銖銖曰為漢誅
叛臣爾豈知其他太祖殺之

石宣二

後趙石宣季龍次子封河間王

宋石宣都統制張威部將金人陷大安軍威頓兵不動
潛遣宣等襲大安大破之

高弼二

後燕高弼仕慕容垂為郎中令見後燕錄

南唐高弼為黃州刺史周世宗征淮南下黃州被擒見

宋史解暉傳

蘇轍二

唐蘇轍為河中永樂縣令貞元中調卒戍邊縣人姚栖雲之父戰沒栖雲招魂歸塋廬墓終身轍以俸錢買地開阡刻石表之見宋史姚宗明傳

宋蘇轍沉靜簡潔為文有秀傑之氣與兄軾同登進士

累官翰林學士遇事直諫無所避諱落職安置雷州

劉權二

前趙劉聰襲偽位封第七子權為秦王

隋劉權豐人大業末為南海太守甚有異政遇盜賊蠶起其子世徹密遣人詣權諷令舉兵權召集寮佐對斬其使

楊軌二

南涼楊軌初為呂光守將及禿髮烏孤攻剋金城軌率

戶數千來奔烏孤以軌為賓客

北周楊軌為芮城縣博士因邑人張元事祖至孝軌等
二百餘人上狀詔表其門

李孝基三

隋李孝基李順玄孫有才學風詞甚美以衛尉丞待詔
文林館至儀曹郎中

唐李孝基高祖從父弟武德初封永安王授陝州總管
劉武周將宋金剛寇汾澮以孝基為行軍總管討之

戰敗被害

宋李孝基進士高第晏殊富弼薦其材任館閣欲一見之孝基謂名器何可私謁竟不往累官光祿卿與父東之同謝事士大夫美之以比二疏

王翊三

北魏王翊王深之子風神秀雅好學有文才為濟州刺史清靜有政績入為散騎常侍國子祭酒

唐王翊晉陽人乾元中山南東道節度使代宗素重之

目為純臣及即位擢刑部侍郎御史中丞

宋王翊郾縣人寶慶進士嘉熙初制置使辟為叅議官
為文訣先墓誓以死報國及北師至募兵拒守城陷
師入公署翊朝服危坐願與此城俱亡北寇相謂曰
此忠臣也戒勿殺翊赴井死

李元禮二

唐李元禮高祖第十子封徐王歷徐州都督絳州刺史
以善政聞璽書勞勉賜以錦綵

元李元禮真定人官太常博士一時禮文多所詳定及為監察御史彈劾無所回撓

劉湛二

後趙劉湛京兆人學明圖讖嘗曰新平地古顓頊之墟里名鷄閭應出古帝王寶器其銘曰延壽寶鼎至苻堅建平十八年新平人耕地果得之以獻見前奏錄宋劉湛湟陽人元嘉中領太子詹事時王華王曇首殷景仁竝為侍中文帝於合殿與四人宴飲甚悅華等

出帝目送良久歎曰四賢一時之秀同管喉唇恐後
世難繼

石榮二

後趙石榮為寧西將軍屯於秦洛及石虎死班師而歸
遇石遵於季城說遵廢石虎子世而自立

後魏石榮為洛州刺史封陰平子御史中尉王顯奏其
恣蕩非軌臊聲布於朝野請以見事免官付廷尉正
臯詔可

唐兩李紳

一順宗第十九子貞元末封袁王

一李敬玄曾孫眇小精悍長於歌詩時號短李穆宗朝為翰林學士與李德裕元稹同在禁署世稱三俊

蘇籀二

唐蘇籀為華亭令簡惠公正時稱賢宰

宋蘇籀文忠公之孫

李榮三

唐李榮肅宗第八子天寶中封靈昌郡王

南唐李榮先主之父性謹厚適丁世亂晦迹民間號李道者先主受吳禪追尊孝德皇帝

周昭義軍節度使李筠初名榮避世宗諱將改之或令名筠筠曰李筠李筠玉帛云乎哉聞者皆笑

楊收二

唐楊收馮翊人幼通經史善文咏時呼為神童位尚書右僕射弘文館大學士為楊玄价所傾賜死

宋太祖開寶九年曹彬敗江南軍於采石擒兵馬部署
楊收等千人見本紀

韓翃二

唐韓翃天寶進士為駕部郎中時有與翃同姓名者為
江淮刺史建中初知制誥闕德宗批與韓翃宰相以
郎中及刺史二人列上帝書春城無處不飛花四句
又批云用此韓翃而郎中得之事甚奇

李若水三

唐兩李若水 一宗室蔣王惲之後蘄州刺史

一少傅李高族弟左金吾大將軍兼通事舍人容貌甚偉在館三十季多識舊儀每宣勞贊導周旋俯仰大有可觀

宋李若水洺州人欽宗時吏部侍郎金兵急攻城邀帝出郊若水扈從金人逼帝易服若水抱持而哭其言甚詆毀金人曳擊仆地或勉之順從歎曰天無二日若水寧有二主哉反顧罵愈厲監軍者裂其頸斷舌

而死

唐玄宗時兩王駿

一開元中為兵部尚書追錄破胡功加金紫仍充朔方
節度大使封中山郡公

一王方慶少子工書尤善琴碁而性嚴整開元中官至
殿中侍御史

唐兩韋綬

一德宗時翰林學士貞元之政多參決於內署綬所議

論常合中道然畏慎致傷晚得心疾不極其用

一穆宗時檢校戶部尚書山南西道節度使辭日請門
戟十二自將赴鎮御事無術庶政隳紊

唐兩李觀

一洛陽人沉厚寡言有將帥識度廣德初克偏將總鎮
南軍政平馮崇道朱泚有功官至涇原節度使檢校
兵部尚書

一李華從子貞元進士授校書郎卒年二十九善屬文

與韓愈相上下有集三卷

張暉二

唐張暉襄城人景龍初為銅鞮令會臨淄王為潞州別駕暉潛識英姿傾身事之王清內難即位召拜大理卿封鄧國公

金張暉日照人正隆進士積官御史大夫明古今禮學建白多允從家法為士族儀表齋居與子孫講論課誦至夜分乃罷率以為常

唐兩李約

一順宗第八子授國子祭酒封邵王

一汧公李勉之子有詩名元和中為兵部員外郎

楊巨源二

唐楊巨源蒲州人貞元進士文宗太和中為河中少尹
有詩一卷見唐詩品彙

宋楊巨源益昌人以右職舉監興州贍軍倉傾財養士
結集忠義三百人誅叛將吳曦補朝奉郎兼四川宣

撫司叅議官宣撫使安丙忌其才誣以謀亂殺之義士為之扼腕

李臯二

唐李臯宗室曹王明玄孫天寶中嗣封授都水使者累官江西節度使兼御史大夫招降王國良討平李希烈進封五百戶

楚李臯仕馬殷為翰林學士及殷子義範平溪州諸蠻立銅柱以為表命臯作銘見南唐書楚世家

王義二

唐王義裴晉公隸人武黃門之死晉公為盜所刺義杆
刃而斃晉公自為文祭之是歲進士撰王義傳者三
之二

元王義寧晉人金末盜起推義為長太祖召為武安軍
節度行深冀二州元帥府事義布教令招散亡勸率
種藝深冀之間遂為樂土

唐兩薛仁貴

一官右驍衛大將軍封平陽郡公嘗擊九姓突厥三箭殺三人突厥下馬羅拜軍中有將軍三箭定天山之歌

一撰周易新註本義十四卷見唐書經籍志

平陽公之在唐其功業偉矣儻復能潛心易理則當時益用欽聳而序述其事者亦必不遺今閱新舊唐書本傳但言起田間絕不譚及文藝事則周易決非平陽公所註明矣楊升菴見志中註易一事姓名適

同不虞為兩人遂謂平陽公為文武兼才與韋孝寬
竝稱謬矣

李傑三

唐兩李傑 一宗室曹王明之子封黎國公

一相州人孝友著稱神龍初河東道巡察黜陟使奏
課最諸使再遷御史大夫賜爵威武子

宋李傑邵陽人熙寧進士出帥湖南特由鄉邑拜松楸
捐俸置書萬卷以遺郡庠買田數千畝以贍宗族

劉謙三

唐劉謙南海人初為廣州牙將乾符五年黃巢攻破廣州去畧湖湘間廣州表謙封州刺史賀江鎮遏使俾禦梧桂以西

宋兩劉謙 一堂邑人景德初為振武軍節度使以足疾求典郡上召見敦勉之進都指揮使移領傑靜軍一開封人為博州團練使兼知邠州元昊寇鎮戎軍謙引兵深入賊境破其聚落而還

李元吉三

唐李元吉高祖第四子封齊王與建誠謀陷太宗被殺
宋太平興國九年五月以將作監丞李元吉為堂後官
京官任堂吏自此始見事物紀原

金章宗泰和八年三月夏遣樞密使李元吉等奏告
唐兩韋溫

一韋庶人從兄神龍中禮部尚書封魯國公既居榮要
燠灼朝野時人比之武氏中宗崩被誅

一翰林學士韋綬之子年十一應兩經舉登第累吏部侍郎出為宣歙觀察使史臣稱其剛腸寡合忠鯁救時云

唐兩元結

一魯山人天寶進士授著作郎遷道州刺史撰大唐中興頌刻於浯溪

一河南人元德秀族弟安祿山亂沉浮人間蘇源明薦其可用帝幸河東結上時議三篇擢金吾將軍以侍

親辭歸自稱漫郎

李珣四

唐李珣江陽人以販糴為業人有糴者即令自量每斗
只求利兩文以資父母年八十餘不改其業適宰相
李珣節制淮南夢入洞府見石壁填金書李珣字視
之極喜忽二仙童出云此非相公乃江陽部民也及
曉遍訪得珣遂迎置靜室師其胎息年百餘歲一夕
尸解見續仙傳

宋兩李珣 一崇慶州人得黃房公金丹之道即往武夷潛修七月而道成乃授訣張紫瓊入青城山莫知所終見廣列仙傳 一德祐初為禮部侍郎乞以刑部侍郎召陳蒙見陳垣傳

張齊賢二

唐張齊賢陝州人聖厯初太常博士論禮制合古義官至諫議大夫

宋張齊賢冤句人太祖幸西都齊賢以布衣獻策上還

語太宗曰我幸西都惟得張齊賢爾異時可使為相
太宗朝累官吏部尚書同平章事左僕射

李元方二

唐李元方高祖第九子武德四年封周王

宋李元方石康人崇寧間上書論廣西便民十事稱旨
累遷朝奉大夫知貴高二州有治行見廉州人物志
劉子翼二

唐劉子翼晉陵人仕隋為著作郎貞觀中召之辭以母

老詔許終養江南巡察使表其所居為孝慈堂

宋劉子翼劉幹季子宣和中知撫信二州開明勤決本之以恕簡易不擾民甚愛之

唐兩李光進

一光顏之兄肅宗朝從郭子儀收復兩京官工部尚書振武節度使封武威王

一光弼之弟代宗朝與李輔國同掌禁旅拜太子太保渭北節度使封涼國公

林鼎二

五代林鼎慈谿人夜讀書每達曙善屬文能書得歐虞
法仕吳越官至丞相性謹正政事有不逮者必極言
之

宋林鼎黃巖人與兄鼐同為朱子門人

張徹二

唐張徹除幽州節度判官適府軍怨其從事盡殺之而
囚其帥徹詈衆曰汝等何敢反衆因叢刺之遂罵不

絕口而死事聞贈給事中

宋張徹景陵人元祐中七持使節八剖郡符公清超邁計口受俸其遺表云神雖去幹忠不忘君

李克讓二

一唐宗室蜀王湛之後官雲夢令見世系表

一後唐太祖克用之弟拜金吾衛將軍見五代史

王昌齡二

唐王昌齡開元進士補祕書郎晚節不矜細行貶龍潭

尉為文緒微而思清有集五卷

元王昌齡守衛輝路起堤坊導水溉田在任八年惠化
大行見衛輝名宦志

唐兩李景伯

一李懷遠之子景龍中諫議大夫中宗嘗宴侍臣酒酣
令各為迴波辭衆皆諂佞語景伯曰迴波爾時酒卮
微臣職在箴規侍宴既過三爵諠譁竊恐非儀中宗
不悅中書令蕭至忠曰此真諫官也

一宗室蜀王李湛之後豐城丞見世系表

趙璧二

唐貞元中有伶官趙璧妙於五絃彈見樂府雜錄

元趙璧中統間官至平章政事帝呼秀才而不名寵遇無與為比

張遜二

唐張遜乾寧初為山陰令會董昌反署置百官召遜知

御史臺不屈死

宋張遜高唐人端拱初為樞密副使擢右驍衛大將軍
知江陵府小心謹慎訐謨無間焉

唐兩李晟

一德宗皇帝功臣封西平郡王

一宗室紀王後裔官犀浦縣尉

王曾二

唐王曾天寶五載官著作郎為李林甫所構下獄死見

本紀

宋王曾益都人三試皆第一楊億見其賦歎為王佐才
景祐二年拜右僕射門下侍郎平章事集賢殿大學
士封沂國公

唐兩李謨

一宗室紀王慎之曾孫武德令 一樂府雜錄云笛羌
樂也古有落梅花曲開元中李謨獨步當時祿山亂
流落江東越州刺史皇甫政月夜泛鏡湖命謨吹笛
謨為之盡妙政視舟下見二龍翼舟而聽

鍾傳二

唐鍾傳洪州人初為小校以州兵擊黃巢有功拜鎮南軍節度使居江西三十餘年累進太保中書令封南平王

宋鍾傳樂平人哲宗時以寶謨閣待制知河中府遣將領銳騎伐夏有功進龍圖閣直學士從布衣致通顯所行事大抵欺妄故屢起屢償云

張建二

唐張建廣明中為棣州別駕時李全忠為司馬有蘆生於室一尺三節心惡之建曰蘆茅類得澤而滋公家必有茅土之慶其生三節必傳三人後全忠果為幽州節度使傳子匡威匡壽皆受節鉞

金張建蒲城人有詩名召為宮教應奉翰林文字以老請致仕章宗愛其純素不欲令去授同知華州防禦使有蘭泉集行世

李謙三

唐李謙德宗第七子大歷十四年封資王

宋李謙興國人咸淳進士為浙東提舉值歲饑賑濟活人甚多官至左司郎中

元李謙東阿人成宗時為集賢大學士文章醇厚有古風學者宗之稱為野齋先生

趙蕃二

唐趙蕃會昌三年為安撫黠戛斯使工詩與鮑溶等同倡和見詩人爵里考

宋趙蕃玉山人受學於劉清之理宗時直祕閣年五十猶問學於朱熹既耄猶患末路之難命所居曰難齋

王縉二

唐王縉河中人與兄維早以文翰著名祿山之亂為太原少尹與李光弼同守太原功效謀畧衆所推先大厯初領幽州盧龍河東節度營田觀察等使軍政嚴肅將校股慄

宋王縉分水人為右司諫知無不言每謂人才難得宜

為朝廷愛惜故不專彈擊而惟論安危大計與所以
啟沃君心者高宗以得諫臣體稱之

李安期二

唐李安期李百藥之子七歲解屬文龍朔中為司列少
常伯叅知軍國有事泰山詔為朝覲壇碑文

宋李安期建寧人淹貫經史援筆成文岳飛死作表忠
詩百二十首吊之

陳謏二

唐陳讜侯官人登三史科累春韶二州刺史仁孝謙恭
餘祿悉與交親共之鄉邦稱美

宋陳讜仙遊人隆興進士終於兵部侍郎學問該博文
章不為險語而雅有典則工書法大字尤精

李揆二

唐李揆成紀人乾元初中書侍郎平章事集賢殿大學
士肅宗嘗謂揆曰卿門地人物文章皆當代所推時
人稱為三絕

宋李揆瀏陽人乾道初授寧遠縣尉獲強盜十數或謂可用賞脫選揆曰殺人以階榮顯吾不為也官至中書舍人

張昌宗三

唐兩張昌宗

一昌齡之兄官修文學士撰古文紀年新傳三十卷與昌齡俱以文學受知於太宗

一易之之弟官雲麾將軍撰三教珠英一千三百卷

與易之俱以美色見寵於武后

宋張昌宗漢陽人處家以義歷八世不分子姓三千口
內外無間言嘉定間表曰義門

李復二

唐李復李齊物之子以廕累官兵部尚書兼義成軍節
度觀察營田等使復置營田數百頃以資軍食不率
於民衆皆悅之

宋李復閩人紹聖間為西邊使者博記能文嘗論孟子

養氣之說朱文公稱其得大旨

鄭潛二

唐鄭潛右僕射鄭朗之弟登進士第

元鄭潛懷安人至正中為海北廉訪副使晚居鄉邑買田建義學以教育後進又於縣西南立二渡買田以給操舟者至今利之有石刻曰鄭公渡

韓倫二

唐韓倫御史大夫思復之祖貞觀中為左衛率賜爵長

山縣男

宋韓倫成德節度令坤之父乾德初為亳州防禦使培
斂民財公私患之

李翱二

唐李翱博雅好古為文尚氣質貞元進士檢校戶部尚
書山南東道節度使謚曰文

南唐李翱保大初由饒州刺史為百勝軍節度留後

王炎三

唐兩王炎 一揚州人宰相王播之弟貞元進士官太常博士 一宣城人與李白為友及死白詩輓之云
王公希世寶棄世亦何早

宋王炎歙縣人為潭州教授以薦知湖州炎初著易解未竟而病篤夜分祝天曰願須臾無死以成此書果如其言

李巽三

唐兩李巽 一趙郡人憲宗時為吏部尚書卧疾郎官

相率省問巽初不言其病與之考校課程商畧功利至夕而卒

一宗室許王素節之孫汝南公兵部郎中

宋李巽邵武人累舉進士不第鄉人侮曰李秀才席帽甚時離身及得第寄詩曰當年踪跡困埃塵不意乘時亦化鱗為報鄉閭親戚道如今席帽已離身

朱衷二

唐朱誕兄弟三人誕為溫州刺史二弟衷教相繼皆刺

是州杜荀鶴寄詩有永嘉為郡昔推名連屬君家弟
與兄之句

宋朱京兄弟四人京登進士官至國子司業弟彥刑部
侍郎襄屯田員外郎襄知韶州皆有時名

李渤二

唐李渤隱於嵩山以讀書業文為事元和初徵為左拾
遺託疾不赴朝廷政有得失附章陳論至九年就徵
官至御史中丞桂管防禦觀察使

宋李渤樂昌人世業儒郡人尊之稱為夫子嘉祐進士知白州

馬周二

唐馬周荏平人少孤貧好學尤精詩傳西遊長安舍於中郎將常何家為何陳便宜二十餘事事皆合旨太宗怪其能問何何薦周即日召直門下省授監察御史

宋司封員外郎胡旦與傭書人翟穎善因為改姓名馬

周上書詆時政且自薦可為大臣又舉才任公輔者
十人其辭頗壯當時皆曰旦所為馬周坐流海島

王逢二

唐王逢王沛之子從父征伐有功歷諸衛將軍忠武軍
節度陳許觀察等使

宋王逢當塗人博學能文尤長講說晚登第為國子監
直講喜著書有易傳十卷

李回二

唐李回宗室郇王禕之後大中初由兵部尚書出為成都尹劍南西川節度使強幹有吏才遇事通敏官曹無不理

宋李回江寧人元祐進士紹興初叅知政事

唐觀二

唐唐觀唐儉少子最知名官河西令有文集三卷

宋唐觀高安人博學著書隱居不仕蘇灤城監酒稅與之為鄰有詩送之

李震四

唐兩李震 一僖宗子封建王

一禮部侍郎李遜之父雅州別駕

後唐李震湖南人莊宗時趙王王鎔為亂軍所殺鎔少
子昭誨年方十歲逃藏穴中震遇之匿昭誨於茶籠
載之湖南依南嶽為浮圖明宗時符習表於朝拜昭
誨考功郎中

宋李震汴人靖康初為小校金人逼京師率所部出戰

被執絝諸庭柱鬻割之膚肉垂盡罵不絕口

薛據二

唐薛據荆南人有詩才位太子司議郎

宋薛據永嘉人明敏好學景定中為迪功郎嘗采諸子
百家輯孔子集語二十卷又撫古今輔相經畧為宅
揆成鑑一編進之於朝

李懌二


唐李懌憲宗第十四子長慶元年封婺王

後唐李懌京兆人好學工文辭唐末舉進士天成中為翰林學士再遷尚書右丞承旨不肯作詩賦為貢舉格聞者多其知體

唐兩董昌

一德宗時京師市人信李度弘妖言而從逆為內官王希遷捕斬見韓遊環傳

一僖宗時威勝節度惑倪德儒符圖而倡亂為吳府顧全武執誅見吳越世家



同姓名錄卷十